

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- केन्द्र गृहमंत्री अमित शाह होरें आखेआ ऐ जे जम्मू प्रांतै च आतंकी चुनौतिएं गी खत्म करियै हालात तौले गै सामान्य बनाई दित्ते जांगन। त्रै रोजा जम्मू कश्मीर दौरे दे अज्ज दुए रोज गृहमंत्री अंतर्राष्ट्रीय बन्ने च अगेत्रिएं चौकिएं दा दौरा करगंन।
- जम्मू कश्मीर विधान सभा दे बजट इजलास दा दूआ गेड अज्ज शुरू होआ'रदा ऐ।
- मुख्यमंत्री उमर अब्दुल्ला होरें श्रीनगर च आयोजित लोक संवर्धन पर्व च हिस्सा लैता ते मकामी संस्कृति, दस्तकारी ते विरसे पर मान करदे होई इंदा जश्न मनाने दा आह्वान कीता।
- आरक्षण नियमें बारे कैबिनेट दी उप-कमेटी नै विद्यार्थिएं ते लोकें दे प्रतिनिधिएं कन्नै गल्लबात कीती ते समावेशी ते सब्बने गी मंजू कोई हल्ल कड्डने दा भरोसा दोआया।
- नराते दरान पौने चार लक्ख श्रद्धालुएं श्री माता वैष्णो देवी जी दे दरबार च मत्था टेकेआ। इस ब'रे अजे तोड़ी 21 लक्ख कोला मते श्रद्धालुएं एह यात्रा करी चुके दे न।

<><><><><><>

HM-JK Visit

केन्द्री गृहमंत्री अमित शाह होरें जकीन दोआया ऐ जे जम्मू प्रांतै च आतंकवाद सरबन्धी हालात पर तौले गै काबू पाई लैता जाग। उनें जम्मू कश्मीर गी परतियै राज्य दा दर्जा देने दे केन्द्र सरकार दे धेड़्यै गी फही पक्का करदे होई आखेआ जे बनकदा समा औने पर एह दर्जा ब्हाल करी दित्ता जाग। कल चिरै संजा जम्मू पुज्जने दे बाद उनें बीजेपी पार्टी मुख्यालय त्रिकुटा नगर च पार्टी दे 28 विधायकें कन्नै दऊं घैंटे तगर चली दी बैठक च उनें बक्ख-बक्ख विषयें पर सोच बचार कीता। बैठका च प्रधानमंत्री हुंदे दफतरै च राज्यमंत्री डॉ. जितेन्द्र सिंह होर बी मजूद हे। त्रऊं दिनें दे जम्मू कश्मीर दौरे दरान अमित शाह होर सुरक्षा हालात दी समीखा करगंन, सुरक्षा बलें कन्नै गल्लबात करगंज ते केई विकास परियोजनाएं दी शुरूआत बी करगंन। अज्ज बडलै ओह कटुआ जिले च अंतर्राष्ट्रीय बन्ने पर स्थित "विनय" अगेत्री चौकी पर जांगन ते मगरा राजभवन जम्मू च जम्मू कश्मीर पुलसै दे शहीदें दे परोआर आलें कन्नै मिलगंन ते उनें गी नियुक्ति पत्र सौंपगन।

अज्ज संजा गृहमंत्री होर श्रीनगर लेई रवाना होई जांगन। कल उंदा श्रीनगर च दऊं महत्वपूर्ण बैठकें दी अध्यक्षता करने दा कार्यक्रम ऐ जिंदे च इक एकीकृत कमान दी, सुरक्षा स्थिति बारे बैठक ते दूई इस ब'रे दी श्री अमरनाथ जी दिएं तैआरिएं सरबंधी बैठक शामिल ऐ।

<><><><><><>

Budget Session

जम्मू कश्मीर असेंबली दा बजट इजलास 12एं दिनें दे वक्फे परेंत अज्ज परतियै शुरू होआ करदा ऐ ते अत्तरूं 9 अप्रैल गी इसी अनमित्थे समें लेई स्थगित करी दित्ता जाग। 7 ते 9 अप्रैल गी प्राइवेट मिंबरें दे प्रस्ताह सदन च रखे जांगन जिसलै जे प्राइवेट मिंबरें दे बिलें गी 8 अप्रैल गी सदन व रखेआ जाग। जम्मू कश्मीर थमां दफा 370 ढाए जाने दे बाद जम्मू कश्मीर असेंबली दा पैह्ला पैह्ला बजट इजलास 3 मार्च गी शुरू होआ हा। जिस दरान नमें कसरेया तैआर कार्यक्रम कलेंडर मताबक कुल 21 बैठकां लगनियां तैह कीतियां गेइयां हियां।

<><><><><><>

CM-Lok Samvardhan Parv

मुख्यमंत्री उमर अब्दुल्ला होरें आखेआ जे जम्मू कश्मीर बल्लें बल्लें पैहलिएं चुनोतिएं ते खतरें कोला बाहर आवै करदा ऐ ते प्रदेश गी राष्ट्र दे विकास च बरोबर दा भेयाल बनाने दे जतन उपरोतली जारी न। कश्मीर सूनिवर्सिटी च आयोजित "लोक संवर्धन पर्व" गी संबोधत करदे होई उमर अब्दुल्ला होरें केन्द्र अग्वे अपील कीती जे इस खित्ते दे विकास लेई बकाया राँहदे प्रस्तावें गी मंजूरी दित्ती जा। लोक संवर्धन पर्व दा उद्घाटन संसदीय मामलें ते अल्पसंख्यक मामले दे केन्द्री मंत्री किरेंन रिजिजू होरें कीता हा। जम्मू कश्मीर दी संस्कृति दा जिक्र करदे होई मुख्यमंत्री होरें मकामी कारीगिरें दी सराहना कीती ते अल्पसंख्यकें सरबंधी मामले दे मंत्रालय थमां शिखा, हुनर विकास ते कारीगिरें आस्सेआ तैआर समेयान गी बजारै तगर पजाने च सैहयोग ते मदद देने दी गुजारश कीती।

<><><><><><>

Army Recover Kupwara

इक सांझे अभियान च कुपवाड़ा पुलस ते 47 राष्ट्री राइफलज नै कुपवाड़ा जिले दे केई जंगली खेत्तर च जंदे रोज थेआर ते गोला बरुद दा इक बड्डा जखीरा बरामद कीता ऐ। इक सोशल मीडिया दे राएं जानकारी दिंदे होई कुपवाड़ा पुलस नै आखेआ जे इस बरामदगी च मशीन गन, ग्रनेड, कारतूस, विदेशी उपकरण ते पाकिस्तान च बनी दी दुआइयां शामिल न। इस बारे इक एफआईआर दर्ज कीती गेई ऐ ते जांच चला'रदी ऐ।

<><><><><><>

Cabinet Sub Committee

आरक्षण नियमों बारे त्रै मिनबरी उप-कमेटी नै सेहत मंत्री सकीना इत्तू हुंदी अध्यक्षता च कल SKICC, श्रीनगर च केई शिष्टमंडलें ते विद्यार्थिएं कन्नै गल्लबात कीती। जंगलात मंत्री जावेद अहमद राणा ते परिवहन मंत्री समीश शर्मा होर बी इस मौके पर मजूद हे। गल्लबात दरान शिष्टमंडलें मजूदा आरक्षण नीतिएं पर चिंता जाहर कीती। उप-कमेटी नै शिष्टमंडलें गी भरोसा दोआया जे सब्बने नजरियै पर बचार कीता जाग ते कुसै बी फैसले पर पुज्जने लेई इक ईमानदार ते समावेशी दृष्टिकोण अपनाया जाग। उप-कमेटी नै जोर दिंदे होई आखेआ जे गल्लबात करने लेई खुल्लापन जरूरी ऐ। उप-कमेटी नै गलाया जे ओह अपनी रिपोर्ट गी 6 महीने दे अंदर-अंदर सौंपने आस्तै वचनें बज्झी दी ऐ। इस बारे गल्ल करदे होई मंत्री सकीना इत्तू होरें आखेआ.....

<><><><><><>

Rijiju Andrabi

जम्मू कश्मीर वक्फ बोर्ड दियां अध्यक्ष डॉ. दरख्शां अंद्राबी होरें कल श्रीनगर च केन्द्री अल्पसंख्यक मामले दे मंत्री किरेंन रिजिजू हुंदे नै मलाटी कीती ते जम्मू कश्मीर च वक्फ सरबन्धी विकास कार्यक्रमें ते वक्फ संशोधन बिल-2025 दे फायदे दे बारे च गल्लबात कीती। डॉ. अंद्राबी होरें जम्मू कश्मीर च वक्फ दी कमजोर प्रबंधन बवस्था च सुधार आहन्नने लेई बोर्ड दे जतनें बारे उनेंगी दस्सेआ। उनें वकु कनून च सुधारात्मक बदलाव आहन्नने लेई केन्द्र सरकार दी सराहना कीती। किरेंन रिजिजू होरें बी मुस्लिम समुदाय दे लोकें गी बिल दे फायदे बारे जागरूक बनाने च डॉ. अंद्राबी हुंदे जतनें दी सिफत कीती।

<><><><><><>

Pilgrims Katra

चैत्र नरातें च इस बारी श्री माता वैष्णो देवी जी दी पवित्र गुफा दे दर्शनें लेई लगभग त्रै लक्ख 75 जहार यात्रु पुज्जे ते माता रानी दा आर्शीवाद लैता। नरातें च आए दे श्रद्धालुएं दी इस गिनतरी कन्नै गै इस ब8रे हुनै तगर 21 लक्ख 25 जहार यात्रु माता रानी दे दरबार च पुज्जियै मत्था टेकी चुके दे न। मां वैष्णो जी दी पवित्र गुफा नै मार्च महीने दे मण्टै शा गै यात्रुएं दा बड़ा रश दिक्खने गी लब्धा करदा ऐ। इस दरान नराते च लगीग 40 जहार यात्रुएं हर रोज माता वैष्णो देवी जी दे दरबार पुज्जियै उंदे दर्शन कीते। ब'रे 2020 च काविंड-19 दे लॉकडाउन दे कारण 17 लक्ख यात्रु गै वैष्णो देवी जी दे दरबार च पुज्जे जदके ब'रे 2024 च एह गिनतरी बधियै 44 लक्ख 84 जहार होई गई। इस ब'रे मेद कीती जा'रदी ऐ जे श्रद्धालुएं दी गिनतरी 1 करोड़ शा बद्ध पुज्जी सकदी ऐ। आकाशवाणी समाचार कन्नै गल्ल करदे होई श्री माता वैष्णो देवी श्राईन बोर्ड दे मुख् कार्यकारी अधिकारी अंशुल गर्ग होरें आखेआ.....

<><><><><><>

Rana Forest

जंगलात मंत्री जावेद अहमद राणा होरें जंगली संसाधनें दे संरक्षण ते प्रबंधन लेई किट्टे रलियै कम्म करने दा रौंऽ अपनाने दा आह्वान कीता ऐ तां जे जंगली जीव-जैतुएं दे संरक्षण ते पर्यावरण माफिक सैलसफा दे विकास पर चेचा ध्यान दित्ता जाई सकै। एह गल्ल उनें श्रीनगर च जंगलात मैहकमे दी समीक्षा बैठक दौरान आक्खी। पर्यावरण ते जंगली संसाधनें दी राक्खी लेई जत्नें गी बदाने दी लोड़ गी दिक्खदे होई मंत्री होरें सभ्मनें मुतलका धड़ें गी एहदे लेई पूरी पराती ते असरदार रणनीति तैयार करने लेई आखेआ। राणा होरें इस गल्लै पर जोर देइयै आखेआ जे जंगलें दे संरक्षण च मुकामी समुदाय दी अहम भूमिका हुंदी ऐ कीजे एहदे कन्नै जंगलें दी कटाई गी घट्ट करने ते जिमी दे टिकारु इस्तेमाल गी बढ़ावा देने ज्नेह लाह हासल हुंदे न।

<><><><><><><>

World Health Day

सेहत आस्तै जागरूकता फैलाने लेई अज्ज पूरी दुनिया च सेहत सरबंधी कुलसंसारी ध्याड़ा मनाया जाग। एह ध्याड़ा हर ब'रे मनाया जंदा ऐ जे हर बारी सेहत सरबंधी इक विशेष विषय पर संसार भरै दे लोकें दा ध्यान अपने पासै आकर्षित करदा ऐ। अज्ज दे ध्याड़े यानि 7 अप्रैल गी गै ब'रे 1948 च विश्व स्वास्थ्य संगटन यानि WHO दी बी स्थापना होई ही। इस ब'रे सेहत सरबंधी कुलसंसारी ध्याड़े दा विषयसार ऐ “नरोई शुरूआत मेदे भरा भविक्ख”

<><><><><><><>